

KAMNI-BITE

(A'CHIKKUO KAN'DIKGIPA DAKMESOKANI)

ARJISON G. MOMIN, B. A. (Hons.), M. A.
Lecturer in Economics,
Tura Govt. College,
Tura, Garo-Hills.

District Library

**GARO HILLS DISTRICT
TURA, Meghalaya**

Accession No. 946/VL

1. Books may be retained for a period not exceeding fifteen days by members.
2. Books may be renewed on request at the discretion of the Librarian.
3. Dog-eared the pages of a book, marking or writing therein with ink or pencil, tearing or taking out its pages or otherwise damaging it, will constitute an injury to a book.
4. Any such injury to a book is a serious offence; Unless the borrower points out the injury at the time of borrowing the book, he shall be required to replace the book or pay its price.

Help to keep the book fresh and clean

Gualako Namatani

Jak	Paragraph	Line	Katta	namatani
1	2	4	2	chusokhee
„	3	1	3	dakmesok gnigiparangko
„	4	4	2	deimechik
„	5	1	1	Iako
„	5	5	bon'ao	. (period)
3		4	1	JANGMENI
„		8	2	NOGIPA
6	1	2	4	komibea
„	2	1	5	noktangtango
„	4	2	1	neng'takpana
„	6	5	bon'ao	. (period)
7	4	1	5	bel belna
„	5	2	1	ong srangjawa
8	1	1	3	rokieke
„	5	1	7	man'paja
9	2	2	5	miksongakonne
„	4	1	4	bewalkoara
„	4	1	6	rikna
„	4	5	7	man'a-
10	1	5	3	dakengade
„	2	2	1,2	Obostara bate
„	2	3	3	aro . . .
„	2	3	5,6	agangrikako knara.
„	4	1	5	sepangosa
„	5	3	4	an'sengbegenmo
„	7	1	3	mesoka
11	1	1	3	dakgen
„	1	2	1	dakna
„	1	9	1	gisikde
„	1	12	2	ong'katangako
11	2	1	1	MESOKANI
„	2	2	2	Sirangni
„	3	1	3	Darangba
„	5	1	3	Saoha
12	1	1	2	Sko
„	1	1	7	da'o
„	1	4	1	noksiko
„	1	6	1	mamingkon

Jak	Paragraph	Line	Katta	namatani
12	1	6	3	uikuja
"	2	1	2	mikron
"	2	1	5	da'o
"	2	2	1	namnikgijakode
"	3	3	3	nikbrejajokkon
13	2	4	5	ra'bae
14	3	3	4	nikenga
"	6	2	3	gnangpiti
16	2	1	5	inkujaenga
"	5	1	7	dakna
"	11	1	5	rakbeako
"	11	2	1	Anga
17	3	2	1	asarangde
"	3	6	1	ong'ade
18	1	8	5	mesok-
19	2	1	2	chong mot
22	5	1	3	re'angronga
24	7	1	4	daktokenggenmo
25	2	3	1	indaka
31	1	1	6	jarinan
"	4	2	5	chanchigija
33	1	3	3	Haida
"	4	1	4	manchako
"	4	2	3	nanzen
"	7	-	-	DAKMESOKANI
"	"	3	1	Sirang
35	7	2	1,2	bewalde ong jachim
37	7	2	3	an sengbeenngenchim
"	8	1	5	pakdapbeasa
38	4	-	-) ['Nie' ni ja'manosa]
"	7	1	3	ka'chagnikoba
46	3	2	5	Indide
50	8	4	1	dakaikua
54	4	2	6	Angdeko
56	5	1	2	Beben
57	2	4	6	bon'ataiaha
61	7	4	1	rikbrangatahama
65	6	1	4	on'timintiba-

Guala bang'anina duk ong-a.

KAMNI-BITE

(A'CHIKKUO KAN'DIKGIPA DAKMESOKANI)



ARJISON G. MOMIN, B. A (Hons.) M. A.

Lecturer in Economics,

Tura Govt. College,

Tura Garo-Hills.

Printed by :

EUROPA PRINTERS

100, Arabinda Sarani,

Calcutta-6. and

Published by the author.

Dam : Tangka Kap Gni.

This book belongs to C...

AGANSOANI :-

Ia kan'dikgipa dakmesokaniko anga A'chikku-o sea-jotani bidingo komibeenga ine nike, maidakode iaba gital segnigiparangna didiatani ong'gen jotton ka'bee seaha.

Iako anga Bihar-o jasana donge okkri-cha'asigiparangna kam ka'engmitingo saksan sikdikdikgipa somoirangko jakkale seaha. (May, 15th—June 15, 1967). Indiba iachi anga chu'sokbee seaha. ine aganna man'ja maina chu'sokgipa ong'nara jringjring sena ranta ka'achisa mana ama. Ian chusokgipa seani ong'a ine anga aganna man'ja.

Iano bang'gija dakmesoknigiparanko done ramram janggi tangbewaloniko ra'e seengon anga darangkoba mik-songe janapjaha are bimungrangko jakkalon chanchichipesan donaiaha.

Ia dakmesokaniko agangope pante saksani maiba a'selchi nokoni ong'katange bilsu ruutbee gipino dongenba, ma'a mamung dakchakaniko man'jaenba chonbea dokan ge'sako demehik baksa kulle obostachi draataniko man'e kragija kamrangchi janggi tangna nangaha. Indake ong'engon salsao ua re'bapiloa saksaba saksako uigrikjae je obostao janggi tangengachim apsanon ga'akaha. Jensalo ma'a detangko ma'sloa ja'manchakdugaaha. Indake jechi nokdangko rikaha, uchin bon'angaha.

Iake chu'sokatanio anga bang'bea ripengrangni ka'don-gataniko aro didiataniko man'aha aro anga uamang pilaknan gro nanggipa ong'a. Anga angni chatu saksa Miss Barbothy K. Marak-ko mittelbena nanga jean somoi donggijako drae iako type ka'na dakchakaha,

Tura.

A. G. Momin.

MESOKGNIGIPARANG

- | | |
|------------|--|
| 1. JONGRAN | ... BUDEPA CHAKKOL. |
| 2. JANGME | ... BUCHUMA...MA'A. |
| 3. SIRANG | ... BILSI KOLATCHIDOK...
JENGMENI DEPANTE. |
| 4. SIKME | ... BILSI KOLATCHI...SIRANGNI
JIK |
| 5. SONE | ... BILSI KOLGRIKGITTAM...
... SIRANGNI NGGIPA. |
-

DAKMEŠOKANI :— 1

MESOKANI :— 1

KUTURI GE'SAO LEM SO'E MA'NINGSA AGANGRIKA.

Jangme : Da'alde salgimikan mikka jimbejok.

Sone : Oe, na'a, dongtoja, ra'toja.

Jangme : Biara re'bapilaigennaba.

Sone : Nang'na aganangane ?

Jangme . Im.....

Sone : Saksasaan ?

Jangme : Haida.

Sone : Biade alamala cholibrangakon.

Jangme : Mai tik ! Nameba aganangja, nangakoba sandija,

Sone : Ia mandeara maidakgipamancha namede uina
man'ja. Kangal ine agannara obosta namkala gita
nika, man'e cha'a inara begalmang-mangkon rim
bitja,

(Ma'gipachiko nie) De, na'ara uni , bilai aro
bewalrangkosa namedake nipaboda.

Jangme : Cechim. Indiba pangnande uipaja, ura.

Sone : Da'sikari Da'sikarichangsarangde obostarang nambea ong'jaha. Robagipa, nabagiparaangba kombea. Kangal cholgrirangde da.nang maidake ruute dongba dongpagen. Da'ororode tangka paisako man'na altuabea ong'ja. Man'echa'giparanga ong'an ong'katrongbreja.

Jangme : De, dongkal cha'kalgiparanga noktangtongo kam ka'paake. Kangalranga attam pringo cha'nan uchi-ichi sandirorona nanga.

Sone : (Nitate) Indiba dongkalgiparanga dam bang'kale on'ake. Game cha'giparanga re'pak cha'pak dakesan dongangaia. (Ma'gipani sko rim'ako nike). Ai, na'ara mai ong'a ? Malkosa jrimjrim chanchikamaiade ? Maiba onga'ma ?

Jangme : Oh.....angara me'trapitlmasa ? Neng'an neng'taknana man'jaenga.

Sone : De, indide, anga nang' kamko ka'skagenba. Na'a neng'takkande.

Jangme : Indakede miksongja na'a. Buchumaranga maikode aganja, maikode chanchija. Alamala gisik tom'tome dongpena man'osaming inesa. Basakobade jari gita an'tangkon chanchiman'a. Gisepode mondolini kamko ka'oa an'sengpagenma ineba chanchiman'a,

Sone : Ai, na'ara agre buchumakujaba. Glpinrang gitade kom'tot kom'si dakkujaba. Ka'e rona skode jekoba man'aikugen.

Jangme : (Ka'dingsmite) Hi, angara nachrakesa roalaba.
 Jebadong ! sinasiachibarade jrengjreng dongon
 namaia. Sakantian nang'gita uko iko daknade
 man'ja, Sone ! Bang'batan nang'gita me'tramitingo-
 de kusi ong'e ronasa chanchitokaia.

Sone : (Gaora de'a gnan) Uamangni kusi ong'ara mai
 mangmang ! An'chingko hisabode mamingan
 ong'srangja, ba ai ?

Jangme : Indakede aganapanabeda, an'chingna batgiparangba
 bang'en gnan. Rachema'angko nikpajakon !

Sone : (Aganako dingtange) Aide bell'belna man'ane.

Jangme : Na'ara maiko uipaasa. Anga dakjaode mamingan
 on'srangjawa. (Sone jrip donga) Sone. na'ara
 maina ku'bososo dakkamaiane ? Saengama ?

Sone : (Mikgitching nie) Mai ong'gnoksa : Mai nangana
 ka'dingsimsimaignokde ?

Jangme : (Demechikko didia gnan) Nang'ni ka'dingode
 salba-jaba dongjawajok.

Sone : (An'tangko parake) Angade jeko daknaba named-
 ake chanchichengronga. Basakoba basakoba turam-
 tangosa ong'ai ong'jai chanchie ka'dingronga. Jakoba
 Jakoba niaride ka'dingja mangja,

Jangme : (Name nitate) Indiba nang'ni mikkanga mai
 ong'enga ? Angade nang'kode salgimikan maibadake
 nikenga.

Sone : (Sko rekreke) Oh.....na'a ang' mikkangko namnikjane ? Mikronminga tik ong'ja, jedakeba nikaigen na'ade.

Jangme : Maitadake an'sengbreja gita nikanasa sing'aia. Sawasa nang'ni mikkangko namnikjawade ?

Sone : Ai, Na'a gisik ra'jama ? Basakoba an'chingo tangka bang'ode batchiba katskana man'ode namgenchim ? Bilsigimik wachi brekbrek aratpila. Rona re'naba sukan ong'ja. Banba a'bri ja'pa ka'sinao, chibima rikam balsrisri dakao rona man'osaming ! Basakna an'chinga iano katate dona gita dongchagensai ?

Jangme : Bia alamala man'e cha'paode cholibranggenchim. Skorangba tikan ong'ama ong'jama. Jada suda dakesa nikaia angade.

Sone : Sko tik ong'jaode indakeba song'renan man'pajaa wajok. Aide na'a, jekoba jakoba pagla chanafa. Ai biara nang'ming bel'belrongane ?

Jangme : (Sko rokreke) Inghing. Gisepo maikoba nangakosan ku'sa ku'gni aganaia. Bang'e bel'belgipade ong'jakon.

Sone : Atcha, biara maidake nironga ? Na'ara maidake nika ?

Jangme : Tchik : angara maidake nikpagensa ? Gisikba nangja, mikronba nikbreja. Jawarangni mikron niarangkoara mainasa nitate roaignoksa ? Mander-

angde badingnok ? Uijaoara jrip dongsrangan
namaia, (Jrip donga) Ra, na'a angko uija ina.
Nibo, daode' (Sko gague)

Sone : (Jaksamsako badaie) De, de ! Jekoba aganbo nam-
jaode namja. Na'ade maikobasa miksongakcne !

Jangme : Maikosa miksongalgnok ! Bewaltangko batchi
galgen,

Sone : Bewal ? (Mikskema gnang) Nampajok ! Na'-
anba basakobade maiba chol nabara ine aganake.

Jangme : Oe. Indiba bewalarra dikdiksano nikna man'a
indake ong'ja. Na'a, maikoba a'bachengode,
baobasa bon'ategen. Ukoba ruutachisa. Angni
bewalara mandeskako nikatgija dakanian. Mikgit-
ching niarin mande maidakipa ong'a winade man'aa
iaba. Talesa uijanaba donga-

Sone : De agangrika dake nitatoara mai ong'gnoksa ?

Jangme : Indakeba man'a man'ade. Indiba nama ong'ja.

Sone : (Agangrikako dingtangible) Ai, biko snaksrangoa ?

Jangme : Snaka ! Jariba ong'ama ?

Sone : Snakna oe !

Jangme : Inghing, pil'anti pil'anti snaka so'ota ! maidake
choligen ? Togiaja cha'bokaja ! Jeoba sieng, jeoba
tangeng-chioai a'gaoai ? lakode dakja mangja.

Sone : Sipaengbora ? Namanama, namjanama. Name
chanchiesa aganpabo..... (jrip).....(Be'en
saksela) Tet-ere ? Snakaja mangaja ! Man'na
nangakoa man'aigenba. Na'a uri gimina mainasa
duk ong'a dakengade ?

Jangme : Ong'a ong'ade. Togie cha'oba togidapangna skaia.
Obestara bads bate namroroangja. Maikon dakpil-
gnok ? (Chakkol are Sirangni agangrikae kaara).

Sone : (Ka'sne) Bikoa bano tuatnaka ?

Jangme : Jeoba namaigen. Nokdechol sepangesa ong'na
nangaia.

Sone : Meja-gita habi-jabi golmal gondokolsa ong'aiane.
(Jrip donga).....A'bri ja'pajoljol, chibimako
ta'srisri niwatode namen an'sengbegeame ?

Jangme : An'sengama an'sengjama, angaba roede nikkuja
ura. Ka'de ka'sinnaba donga.

Sone : Sinemarango messoka gitade namen an'sengbeasai !
Na'ara nikpakujama ?

Jangme : Gisepode nironga. Noksaoara maidake an'senga
an'sengiako uignoksa ? Jekoba jakoba an'senge
nikataia.

Sone : Put ! sinasa siksrangea angade- Basakona iano
katata gita dongdamgensa ? Patokba ong'ja
rong'kolba ong'ja.

Jangme : Maiko dakgeni Jakoba aganbo, iano, bang'en eakna nanggni dongkuenga. Pilakkon matchotjokosa maiko dakgen chanchiaignok. Nang'gita ong'ai ong'jai chanchina somoi dongja. Banon sigen, banon bon'gen sawasa uisognok ? Sa, aganna man'a ia nok busruon ong'naba gnang. Namoba namjaoba an'chinga ianon ruuta bilsirangko re'ataha. Nang'pa sia intalan. Jechi re'angoba gisike ra'kamamaigen.

Gualtokna man'ode namachim'. (Jrip donga) Atcha, Sone, taribojok. Mai ong'a mai ong'ja, (Soneni nng'katangako nirika. An'tangba ong'katanga).

MESSOKANI :—II

(Kuturisao Srirangni jikgipa re'bara).

Sirang : (Neuate) Daraagba dongja ? (Sikme nabara) He, na'asa

Sikme : Mai daka ? Angade ong'katangengane. Mai daktokenga inesa neupakna re'baaia.

Sirang : Ra. Saobo re'banaba donga, na'ara re'angboha.

Sikme : De saoba re'baoa angade grongpana man'jane ? Na'asa.....(Jrip donge) Ian ne ?

- Sirang : ('Sho nongnenge) Im.....iankon. Anga da'e bilsu kolgrik ong'angaha, ia nokko da'osa ga'dape-taienga. Soneara unode bakgitchakpiti. Biara nokshiso malrurue rokuenga. Amara angkode changsaba ku'dimean nipa'aba. Unode angaba mamingkom chanchina uikujo.
- Sikme : (mkron wange nie) De, da'e namang nang'ko namnikgiajakode mesokkujakonba ? Ma ade detangkode gualja mangja.
- Sirang : Ong'naba donga. Indiba da'o bilsu kolgrikna dingtang dongahaoa, maibade ong'enggnok. Amaan buchumabejok. Mikronba nikbrelajokkon. Anga an'tangan upiljahara.
- Sikme : Im.....Na'aba napari jrip dongaiajokona. Iara bilsu kolgrikna skang nikanga gita ong'jahamade ?
- Sirang : Gisikan ra'brejajok (Jakko chin dake) Bisong angna ku'sikkon agansoja. Angni cha bi'paoba paia on'esa ringna man'aia, Angko adita nitata nitatade. Ma'de ma'sijahakon.
- Sikme : De nangkon uijahaoda na'an aganskapaboke. "Anganba" ina mangmangko agannara badita neng'asa ?
- Sirang : Ong'a ong'ade. Indiba pilakchikon chanchienga. Pilakna skang angara branggipa depanteni golpo gita angko rimchaksopagen inesa ka'dongpaachim. Cha kapsakon angna palara, badinkuna ? Unasa angara jrip dongaiajok.

Sikme : Uijajokona indakpagen da'nang ! Na'aba ku'sa-koan aan aganjajokona.

Sirang : Indakede ong'fachim na'a. Obostarang draataha. Unbaksaba angara sketbaket dakna sikja aro daknaba namnikja. Angni miksongara alamala uaman-gna angni je man'paako ra'bao kusi ong'atpanasa ong'achim. Apa siaha ine knasoaonin anga iaman-gna maikobade daskapana nanggen ine chanchie dongsopaengachim. Indiba iako daknara da'o akuabea ong'ja ine nikenga. Depantekon jawa-gitasa chanaide angara mai dakgnok ?

Sikme : Indiba na'ara maina jrip donga ? Beben basakobade jrip dongaba namgninasa. Indiba indaka obostaode jrip dongna nangja mangja. An'tangkon donmitape noktango napoa sawasa ku'dime rimchaksognok ? Inghing, na'an maikoba gualenga.

Sirang : (Gakgue) Atcha, jrimbee ra'nabejok. (Sigaret so'bake) Indaken ong'aichinaha. Anga uamangko a'paloni gita grongskae parakatna jotton ka'gen, aro maichi iamangna kusi ong'gniko on'na mangan uigen. Indiba iako dakon mai kattachi parakcheng-gen mikkang ki'sang chanchina nanggen.

Sikme : (Jrimbate) Inghing. Indakede nama ong'ja. Na'a sawa uko mangmangde uamangna aganchong'motna nanga. Unon uamang chanchipilgen.

Sirang : Chanchipil'ani kattade raka, rakade.

Sikme : (Nitate) Indide jrengjreng parakaiboke. ' Angan nang'ni depante, iara angni jik. Chinga Songdu nalsao dongenga. Indiba anga ruute a'palo dongengon ma'a gri katchaaniko man'jaenga. Anga na si mangko nangchongmora," ine aganna mangmanga mai neng'ani gnang ?

Sirang : Indake ong'ja na'a. Angade bisongko nangja. Uamangsa angko nangenga. Me'asade antangnasan dongaijaba.

Sikme : Ong'a ong'ade. Indiba ianona re'bachengaonin angade maibadake chanchiman'engawai. Darangkon maming kusi ong'ani grisə nikennga. Nang'oni intalan (saijole). Nangnikjaoara mainasa re'badila ? Ukoba dakjaode re'pilsranggnok ! Iachi maming katchaanikoba ra'bajawa. Na'a namedake chanchilbo.

Sirang : An'chinga kusi on'ge ronade re'bajaba. Iano mai dongtogijani dongade ? Na'ara jekoba cheng'beesa ra'aiade.

Sikme : (Kao'nanga gita) Indide mainasa tik gri bik gri dakenga ?

Sirang : Kusi ong'ania pilakkon man'gopa, iade ong'ja. Minggipin dakgni gnanpiti. Angni dakgniara amako grongeanian ong'a. (Saniba ja'birangko knaa. Jikchiko jaksi ote) Eh, saoba re'baenga. De na'a on'katanghojok. Sikme. (Janggilo dangtape.)

Sikme : Na'ara noktang jamtangona re'baaha ong'ode
mainasa gipin gitcha gita dongenga ? Inghing
ong'katangjawa ! Angara mai ong'a ?
(Mikkang gitachakbaa)

Sirang : (Dangtape) Uchi re'angbosai ! (Do'gachol gita
sikapkata) Bakbak re'angbo. An'chingni rasong
nama. Jajrengnabe.

Sikme : Angaba dongpaaegen. Ku'samangniangkode agane
nipana. Na'ade indaken bon'ain akengaha !

Sirang : Inghing, na'a re'angbo. Na'a re'angna nangchong-
mota ! (A'palchiko neuata).

Sikme : Sirang ! an'ching bilsa bongana jik se ong'e dong-
manjok, na'a gisik ra'bo.

Sirang : Oe, bilsa bongajok.

Sikme : (Segipako rim'e) Nang'ni indake a'rikani ja'pang
mai ? Bia ka'chenga intal na'a ku'saba angna
indake kattako agankuja. Da'awalo an'chingni
dingtang dingtang dongatna nangania maiko mik-
songa ? Namoba namjaoba anga nang'na ka'sac-
hongmotaha aro da'o dipet nang'ko mamungsaloba
gipin gita chankuja. Angara nigijagipa jik ong'ja,
ong'ama ?

Sirang : Angara nang'na maiko aganahare ? Aganakoba
ma'sija.

Sikme : Indide da'o biaptangko done maina anga gipinchi
katna nangaha ? Nang'ni miksongakoba ma'sia.
(Mikchi ong'bara)

Sirang : Aha, na'ara iana batede angni ka'saaniko chu'ong-nikjama ?

Sikme : Chu'ongnikja inede anga inkuja anga. Indiba ka'saana agreba nang'ni ong'ai ong'jai chanchianirang gnang. Iani a'selsa da'oba jiktangkon rikgalpilna nangenga. Anga gale katangjawa. (Gipake grapa) Na'a gri anga bao tugen ? Re'angjawa, re'angjawa ! (Ka'siksika).

Sirang : (Rake morokroke) Na'ara bi'sapitima ?

Sikme : Bi'sa dakgento An'chinga uchin kusi ong'paachim. Iano walo saksan tuna kenenga. Inghing, anga saksan tujawa. Na'a jekoba inbo

Sirang : Ma'sina jotton ka'paboda. Jeko anga dana nangen-ga, na'ara on'titikon chakchikpana man'jama ?

Sikme : Maiko chakchikatkuade ?

Sirang : Angko saksan amako grongna chol on'bonesai.

Sikme : De sawasa nang'koara champengengane ?

Sirang : Indide na'a re'ongboaha.

Sikme : Batchi ?

Sirang : Aha.....angara nang'o aakbeako bi'jaengaba. Anaa togichongmotjawanesai. Walsa mangman-kosin ! Ia me'chik sankgnina angni saksan talatna nangni gnang. On'tisa cholko on'pana na'a sikjawama ?

Sikme : Ka'sagiminde dakteani dongjamangja.

Sirang : Na'ara me'tra bi'sa gita chanchiaia. Angara nang'na ka'sajama ?

Sikme : Indake ong'ja. Indiba ka'sachongmota mai me'-asarngde uija. Mamingchin uamangko ma'siatna man'ja, okkaatnaba amja. Pangnan maikoba nangan maikoba dakgenna, batchiba re'genna, nok gitalna jam gitalna agankamaia ! Mamingchin bang'ade ong-jawa. Me'chikra nga indake ong'ja. Uamanga janggi tangania dikdiksanasan, aro ka'saaniba uanonasan; apan dongrime, apan turime me'asani ka'saaniko nanga aro mamingsaloba dingtang dongna sikja. Ka'saahaode, ka'saaha gip-inko chanchina somoi dongja.

Sirang : Tchik ! Na'ara an'tangkosan ma'siaia. Iara rakamasa ? Angara amako uie uko maikai kusi ong'atna amgen ninasa am'engaba. Angni chanchie dakaniko na'ara nie dongpaibora. Iamang gri angara jagring gitasa ong'aigen. Iamang gri nang'ni ka'saaniba chu'sokjawa.

Sikme : (An'pile) Oh, na'a jekoba aganaigen. Maikoba daknakode ban jik, ban de nipiljawa, chanchijawa, pa'sikanian bang'a. Nang'ni kattaranga nang'ni sikdikdik janggi tanganisa, ka'saaoni ong'ja.

Sirang : Iako agankunabeda. Angara angko saksan watangkubo ine mangmansan aganengaba. Anga gisik-

tango jeko chanchia uko mangmangde parakna
 cholko on'paboda Mai chong'mot ong'a ukode
 Isolsa uiaijok. Iako dakachi anga nang'na maming
 ka'sagijaniko ba kakket ong'gijaniko me'okkuja-
 engu. Katroro katjojoe dongara nama ong'ja
 aro pangnande a'gittal ong'e dongnaba man'ja.
 Mande kusi ong'aniko man'gen beben, indiba ua
 a'gilsako maironggipa ong'paachim ukode masok-
 pana nanggen. Iachisan anga angni ka'sagiminrangna
 kusi ong'aniko ra'bana angen.

Sikme : De na'ara iarangko man'chapgijan man'aicenba
 (Segipako nigitoc) Na'an ong'gijako dakenga.

Sirang : Angara mai ong'gijako dakengane ? Indakjaode
 maikai anga iarangko chanchigen aro dakchakgen-
 chim ?

Sikme : Name dakode nama. Angade je biapo an'ching
 kusi ong'e dongna man'achim ukosan chanchina
 man'aia aro angni dakgniara nang'ko kusi
 ong'atnasan. Jawarangni nanga nangjani gimin
 anga chanchina man'ja aro chanchinaba sikja.

Sirang : Atcha, na'a jrip dongbo. Anga maiko dakna
 nanga namedake sandigen. na'a jajrengnabe.

Sikme : Nang chanchiakon dakaibo indide. Na'a ka'sapaode
 uan chu'ongaia. Jeba ong'bo nang'ni nangnika gita
 anga senggen aro na'a matchotman'ode anga a'ba-
 chengskagnok. Da'alo kusi ong'atgijanina anga na'a
 ka'saja ine chanja, indiba na'a angko jiktang ong'-

eba an'tang baksa dongna on'paja inesa matnangenga. Mea'asaranga an'tangtangkosan chanchie jiktangtangkode gisik saatrongbea aro an'tangtangni dakgnikosan chanchiaia.

Sirang : Chog'mot chong'motde. Indiba na'a gisik sapana-bene aro jajrengnabe. Iano kenchakani gristrang, Anga jeko chanchienga ukosan dakgen aro uan chu'sokchongmotgen- Na'a da'awalsa mangmangna amana aro anona angko donangenga.

Sikme : Indide, Wal Nam ! Angni nang'na ka'saani pilak namgijaoniko champengchina. Angade cholgri, nibo ia jakranga ararasa ! Na'aba maibakosa chanchiaia. Mai ong'a nisopaaignok.
(Sikbregija ong'katanga).

(KUTURISAO)

(SONE NAPBARA).

Sirang : Salam (jakko snile) Angna kuturiko donahama ?

Sone : Oh ! Na'a. Tariman'enggnok. Na'a tebil kosako
ki'tap donga, nang'ni bimungko see donbone.

Sirang : Ra. Na'simanga maidakgipa chakkolko rakkiade ?

Sone : Mai ong'ane ? Ba-a, da'alsa biko matnangako
knachenga ! Indita bilsı dongengaha darangba
indake agana dongkuja. Biade katta manibeaba !

Sirang : Oh ! Angara matnangjaenguba. Biko maibadake
nikanasa aganaia. Biara ku'mama ?

Sone : Ku'ma ? Hi ! (Ka'dingsmite)

Sirang : Indide mainasa aganjane ?

Sone : Biade on'tipraksan sing'akosa aganchakaia.

Sirang : Jeba ong'bo, jeko aganoba knaja gita nikkamaia-
nasa.

Sone : Knajade ong'jænggen. Name ma'sijaengnaba donga.
 (Kattako dingtange) Nang'ko mai mingamo ?
 Sing'teka gita dakaijokne.

Sirang : Sirang.

Sone : Sirang-sanma ?

Sirang : Oe.

Sone : Na'ara basako badia songo atchiamo ?

Sirang : Da'o bilsil kolatchijok.

Sone : Bano ?

Sirang : B.ghmarao, na'a.

Sone : Mai kamko ka'enga ?

Sirang : Dongja. Ramram game cha'paaigipasa.

Sone : Ba-a ! Indake songree ronade na'aba gong'asajok.
 Alamala cholibrangakon ?

Sirang : Cha'na ringna mangmangde alamala dongbranga.
 Bang'e man'pajaoba, man'atangko chu'ongnik-
 paia.

Sone : Na'ara a'we jolni mo ?

Sirang : Oe.

Sone : Da'oa bano mancha dongenga ?

Sirang : Songdu nalsaonesai.

Sone : Uchinisa re'baane ?

Sirang : De, baoni re'baata ?

Sone : Na'ara nang'mani songchi re'angpajane ?

Sirang : Gisepo rn'angronga.

Sone : Da'o bachinasa mikkangenga ?

Sirang : Indaken re'roroenga, Batchi soka, batchi sokja,
ja'manosa uiaignok.

Sone : Indide na'ara iano waltugenma ?

Sirang : Haidade. Maikon nikgen, maikon nigen, Ja'manosa
chanchiaignok.

Sone : Maming ong'jawakonba ? Ma saoba sengenga ?

Sirang : Gri. Sawasa sengpagnok.

Sone : Atcha, na'ara name songreenggipama ba katroro-
gipama maidake uignok ? Nang'o maiba sakki
donga ?

Sirang : (Cho'a jeponiko knoka) Ia lekka dongaba.

Sone : Nangjawa, nangjawa. Maiba sakki dongama tnesa
sandiaia. Da'ororode manderangba tik ong'jabeawai,

Sirang: (Lekako on'e) lakai, nipaboda. (Sone ra'e nia).

Sone : Ha, na'an rakkiaibo. (Lekkako on'pile) Na'a uchiara Songdu rikamo dongane ?

Sirang : Oe, (Jamang jumang dake).

Sone : Oh. mingsa jamangenga. Nang'oara jik de dongama ?

Sirang : Im. Skangosa. Indiba wate katbaaoni da'o baditaba bilsijok.

Sone : Or.g'ja, na'a bia ka'ahama inesa.

Sirang : (Namnikbregija) Mainasa sandia ? Darangba indakede sing'jamangja.

Sone : Maika'gen. iako sing'china gita tarigimin donga. Je ong'oba gapatnade nanggento.

Sirang : Maina, habijabi ! Bia ka'manjok oe. Na'ara jakstemko nikpajama ? (Jaksiko mesoka).

Sone : Nikjara. Mainasa jawani jaksirangko nirikkignok ? Ia lekkao gapatnasa sing'ataia.. .. Oh .. nang'ni jikni songa banosa ?

Sirang . Mainasa ? Biara songtangan dongengaba.

Sone : De, chu'onggnok. Nang'ni biapko tarimitingo na'a cha'genma ? Bijakkoara chu'onga gita song'ahakon.

Sirang : Nangjawa, na'a. Na'simang namnikpaode waltup-
anasa am'aia. Mainasa na'simangkoka habi jabi
dakatgnok.

Sone : Mai habi jabikosa ? Iara pilaknan tarigimin. Maisa
ong'algnok.

Sirang : Oe, oede. Basakobade saksanan jinmana bate
kajia naatawai.

Sone : (Nichaoe) Mai daka ? Na'ara bel'bele somoiko
re'ataia. Angko jari ine chanchinaba. Ianona
darangba re'bajawa aro namung golmalba dakjawa !

Sirang : Indakede maidakesa kam cholignok ? Man'dap-
panasa darangan kar.ko ka'para.

Sone : Chinga ma'ndapani 'dongjanaba gnan, indiba
daranganan dongtoaniko on'a, jekon bang'bea
tangkachiba brena amjawa ! Gisik ra'bo, saks
na...gipa mandean jinma bokbokgiparangna bate
nambata ! Indakesa chingade sokachakronga.

Sirang : Basakobade ka'sindikdik daktoaenggenmo ? Na'-
simang ma'ningsara aratpajama ?

Sone : Chingni arata aratjani gimin nang'na mai bak
nangpaasa ? Na'ara sokgipa, sokgipana krakra
dongbo. Na'a jajrengna nangja, jeko nanga ukon
on'gen. Chingni sikdikdika diksikdikjani gimin
nang'ni uipaani ong'ja. Jedake ong'a ong'chii a.

Sirang : De. Kemane. Angara nang'ko ka'onangatna mik-songede sing'jachim. Angni gisik nangpaakosan aganata. Angara an'chingni gisepo chel'grikbea ong'ja ine chanchiesa aganatmana. Iana agre mamingkoba miksongjachim.

Sone : Nang-na da'sion aganman'ahaba. Angko gisik saata saatjani gimin nang'ni maming aganpaani gri. Put, indakana mangmangna gisik sadobokja anga, Jeba ong'bo nang'naba angnaba namna gita an'ching chel'griken ra'na nanga. Na'a habi jabi aganangkuode nang'nan namjanaba donga. Iakon gisik ra'bo, na'a me'chik sakgnini noko dongenga aro chinga darangkoba ripeng kana man'ja.

Sirang : Chong'mot ! Angni ma'siningjana duk ong'a. Kemane.

Sone : Mainasa duk ong'algnok. Na'asan indake chanchina man'aia inachiba ong'ja. Angade iarangko seng'en chanchironga.

Sirang : De, chu'onggnok. Neng'taknaha.

Sone : Da'rang songregipaan ong'ai ong'jai golporangko aganrongaindiba chinga ma'ningsani gimin janapkuja Saoba saobade nokdangtango golmal kajiani gimin ba maiba a'el ong'arangni giminsa aganronga. Chingade jrengjreng knatimesa ropaaia. Indake ma'siode darangba gisik saani dongja.

Sirang : Angade an'tangni giminde maiko aganna man'pagen.
Nangbeaba ong'ja. Anga iano dikdiksanasan donga-
iode angni gimin talatani namgni gri, indiba ruute
donggenchimode na'simang angni gimin an'tang-
tangan talaegen.

Sone : Oh, angni aganana gisik sana nangja. Anga an'-
tangba gisik saja, aro gipinkoba gisik saatna sikja.
Badeatmanahaode kemane.

Sirang : Kema ka'mannahaba. Pilakkon namedake agan-
grikachisa saksa sakgipinni gimin taIgrikna man'aba.
Uni gimin an'chingni gisipo ma'sigrikani dongaha-
ode nama. (Ma'gipa napbara) Oh.....
(chadenge jak snila).

Jangme : Salam. Nang'ni kuturiko tariman'jok.

Sirang : Mittelbea.

Jangme : (Demechikko) Na'a seman'ahama ?

Sone : Da'sion matchotman'jok.

Jangme : Ninasong. (Sone ki'tapko on'ata) Na'a gisik
sapanabene. Mitam manderangde tik dongjawai.
Unasa namedake nina nanga. Ah, Sone, na'a
iano maini gimin re'baaha sekujake.

Sirang : (Sengnapgija) mainara ? Songregipasaba.

Jangme : Mokma dareko ninakane ? Wachiode nitobea. Da'o
gitade ru'at bang'ane.

Sirang : Wachijekona ru'atde bang'aigen. Indiba anga ia biaprangko 'nie' totainaba nanga. Iarangko anga pangnan gisik ra'ronga.

Jangme : Na'a iano skango dongangahane ?

Sirang : Ong'ja. Indiba skango ia gitan re'pakronga. Ukosa gisik ra'kuenga.

Jangme : Da'oba songadamsan ong'kuaenga. Mamung namdapani dongkuja. Sorkariba uko dakgen uko ka'gen ine bon'ataia.

Sirang : Oe, indiba angade ia biapko namnikbea. Ia noko napea intalan noktango dongenga gita chanchiman'a.

Jangme : Na'a iano donggen ?

Sirang : Tik dongja. Dongnaba man'a, dongjanaba man'a. Indiba biapsano ruute dongnade maiba a'sel dongna nanga, ripeng bang'ani ba manderangko namnikani. Ong'jaode maina donggensa ? Da'o dipet angko namnikaba namnikgijako uikujani gimin angni miksonganiko uikuja.

Jangme : Maiko miksonga ? Angaba uija.

Sirang : Uia, uiade. Indiba talbatc aganna kenenga.

Jangme : Jekoba aganbo, na'aba ruutgijan ia biapko namnikjawa.

Sirang : Indake ong'ja. Chol ong'ode anga skango ong'-
anggiminrangko gisik ra'e katchabatgenchim. |

Sone : Ba.....ap.....re / Malko gisik ra'asa ? .

Sirang : (Knachakgija) Mai, nang'kode duk ong'bea gita
nikenga, maiba ong'ama ? Iano donga ruutbe-
jokma ?

Jangme : Ruutbejok ruutade. Basakoninchim, gisikan ra'
piljaha. Angni metramitingonisahara. Indake
angni saksan brange janggi tangengon angni deme-
chik saksamangmang angna dakchakbeaha. Ong'ja-
ode bikoba gualman'gnokchim .

Sone : A.....a ..i...| Na'a maiko aganchaade ?

Jangme : Aganna skakosa aganataiaba. Maisa ong'gnok ?

Sirang : De, agannabejok. Na'simangni gisiko mai gnang-
chim anga uiaha. Ian ruutbea bilsirangna neng'bee
janggi tangbaahani giminsa ong.aha. Saniba
bilgnang dakchakaniko man'genchim ong'ode badi-
tan nambatgenchim !

Jangme : Skangode dongpaachim, indiba kamsa bang'dugas:
kara. Chinga bura burian kam ka'dugaen saks
sakgipinko nirok sandigrikna ja'mangpila. Da'ode
gualsrangjok.

Sirang : Angaba aditan ma'sia. Indiba depante dongenba
uni dakchakaniko man'ode baditan namgenchim.
Haida ukode na'a gualjanaba dongachim.

Sone ; (Sengnapglja) Ai, bel'belchanabeaha. An'chingo bang'en dakgni kam gnang.

Jangme : (Knachakgija) Depante ! Angara ban depanteko man'kugen ? Butchumadugajok. Butchumarangde dedrangnaba ka'sanan jamangaia. Gisikrangan maibasa ong'angaia.

Sirang : Ong'a ong'ade. Indiba detangde gualpajawa, da'nang.

Sone : Depanteba pil'baeng mai da'oara. Gipinrang jekai cholia cholipana nanggen. Maming dingtang-grikani dongja. Jawarang jekai bhara on'e donga apsan gitan dongpana nangaigen. Dongani cha'ani damkosa chingaba ra'aiaba. Ban ka'tong ban gisik, ma'siakonba ? (Ka'onanga gita).

Jangme : Na'ara maiko uipaasa ? Jrip !

Sirang : Songregiparang iano ruute dongangrongama ?

Sone : Mitamrangde adita ruute donga. Indiba dongpa-gijarangde cha'pak ringpak dake re'angtokaia.

Sirang : Angaba man'e cha'ade ong'paja indiba cha'na ringna mangmangde korosde dongpara. Haida obostako niroke aro na'simang namnikpaode iano adita salrangna dongna skenga. Nangnikode da'oba mitamko on'sona man'gen. Da'sinin bel'bele jamangaenga. (Jepko dangkroke).

Jangme : Jamino on'atboaha. Maiko tik ong'gija gita dakasa ?

Sone : Man'e cha'jaoba rangka dongode namaia. Ma'ka'saa mai mitchia agarichananabeaha. Maibada-kode gisik samana. Nang'naba namjanaba donga. Ha, iakai chabi. Maiko nitarkua ? (Chabi done re'anga).

Jangme : Che, uni ong'ai ong'jai kattakode maina knatima-engna. Biade name chanchina gisik sokkujani gimini mitam kattarangkode knana man'ja.....Uh... . (Chakatna daka, Sirang re'baa) Nangjawa, dede. Anga bilakkuaba. Bewalkode amaba amaekugen.

Sirang : Oh, angaranang'ko bilgri inede chanchija, Oe na'ara mainasa angko 'dede' inpa ?

Jangme : Butchumarangni aganani bewalsaba. Darangkon detanggita chanchiman'aia.

Sirang : Ra, anga angni kuturiko nickuna.

Jangme : De. Awa dogacholchipakgipaan. Unon budepa sengenga. Na'a maikoba nangama ?

Sirang : Nangjawa. Na'songni jaksramaniaa mittelbea. (Ong'katanga)

(SKO KU'ET KU'ET DAKE KUTURISAO ASONGA)

Jangme : (An'tang saksano). Hm '. Mai jarinana angni raka rakjani gimin aganman'aha !. Inghing, anga pil'nipil kragija kamko ka'e an'tangko ong'siroroa-tenga. Ia mandea namgipa. Maikai una kragija kamko ka'gen ?
(Sone gong'rake napbara).

Sone : Aide dipanengakon ?

Jangme : Ia me'asani giminsa na'a.....Na, an'tangkosa.

Sone : Maiko chanchidamna nangasa ? Knalna donai-boaha. Na'a uni gimin chanchigia dongna man'-jaode maisa ong'pilgnok ? Kraesa dakpabo.

Jangme : Na'ara pagipa gandamanda. Mikkang ki'sang nipilani gri. Jekoba dakbo namedake chanchi-chengpana nanga. Sakgipinko chanchina aganoa an'tangosa name chanchianiko naatskaenga.

Sone : Maia nama, maian namja. Tusina skeming bel belaranko, Hai tusignok. Donaibojok.

Jangme : Namgen namade. Indiba ia mandeko maina indin onia ka'gen ? Bia an'chingna mamingkoba dakkuja.

Sone : Na'ara maiko dipanbeade ? An'tangde nambea inagita. Mai nangana jawani nama namjani gimin sandipana nangasa ? Me'asarangde bang'bata salon jara dakaia na'a, Biara mai mangmang.

Jangme : Indakede inabeda. Da'o dipet an'ching darangkoba matnangkuja. Da'awalde anga neng'beaha. Na'ade nangai nangjai bika dal'e roenga. On'titi tangkanaan mikboke dakoa namgenma ?

Sone : De sawasa tangkana mikbokasa ? Angara iano aratani giminsa gipin biapchi katna cholko sandiengaba. Inghing, anga iano jari dake dongchana man'jawa. Na'aba butchumajok aro neng'takaniko nangenga. Anga jeko dakna miksonga, miksongaha. Nipil nichaani dongjajok. Je cholchiba an'ching ianoni ong'katna nanga !

Jangme : Sone, na'aba skango nang adani ka'onange angko galchipa gita gualsrangbo. Indake ka'onangede angna mesoknabe.

Sone : Ai, angara nang'ko ka'onangatjaengaba. Na'a dongjaode angara mai mangmang ? Me'chik bi'sa suriara maina cholipagen ? Inghing ai, indake chanchinabe. Anga badeatman'ahaode kema.

Jangme : Oh, ai na'ara namgipa demechik ! Basakobade butchumarangde bingbang inmanaia. Ja'pang ja'dil gri. Indiba gisik ra'bo da'awalo ong'ja !

Sone : Mai ! Knalona, sotniona ? Ba-a ba-a ! Mai inako inengasa ?

Jangme : Angara maikon agana maikon aganja uipil'ang-
jaengaha. Jeba ong'bo da'awalo ong'ja. Tom'tome
an'ching tusignok. Hiada ia mandean an'chingna
maiba dakchakaniko on'naba donga.

Sone : Mai dakchakanikosa on'algnok? Uoniko maiko
man.rikna ka'dongenga? Man'bialaha waltuani bhara
kosan !

Jangme : Hai betbetnabejok. Tusinaha, waltingangengjok.

Sone : Indiba an'ching maimanhako dakgen namedake
chanchie donchengna gnangecn. Da'walon, ba pang-
naba ong'jawa !

Jangme : (Mikron reprepe) De. tusiboaha. Maiko indita
bel'belna man'ade? Da'sinin ajambeengjok.

Sone : Na'anba dondikjaenga. Gisikde ra'engakonba ?

Jangme : Im.....

(Tuna re'anga).

DAKKMESOKAI:—II

MESOKANI : 1

(Siran turamo il'leng pilgeng dake chanchienga)

Sirang : (An'tang saksan tue). Mainan Sikmeni aganakan
dakalajak ! Maikon dakpilgnok ! Tuan tusinap-
jaengjok ! Ah ! Sani nokon waltupaenggen !

Angan jara dakbejok ! Songtongan walbaode an'-
 sengpaachim, ianode obostaan namjabatroroenga.
 (Sko rokreke) Ong'ja, ong'ja. Iano mai an'seng-
 gijani gri ? Me'asa on'ge miksongatangko chu'so-
 katna gando ganjanaki ? Ia.....ia kuturion pilak
 kamkon chu'sokatna nanggen.
 (Do'ga doktike Sone napbaa),

Sone : Angara golmal ka'jawamasai ? Ia gamcha aro
 chine.

Sirang : Oh, pilakkon donangahakonna.

Sone : Inghing, ua budepade gualchiprongaiawai.

Sirang : De, mamung on'ja. Na'aba golmal dakjaengaba.

Sone : Maiane ?

Sirang : Oh, nangni agana gita namjanaba donganesa.

Sone : Che ! na'ara ramram kattachide aganchakna man'ja-
 masa ?

Sirang : Moskilsai. Angade bang'en ianoni bewalrangko
 skie ra'kuna nangenga. Jeba ong'bo anga
 iarangko name ma'sina dikdiksa somoikosang nangai-
 gen.

Sone : Indinakon angaba am'enga. Indiba ia kuturide
 nambea ong'jane. Na'ade dongtojanaba donga.

Sirang : Namja ! Baoniko indaka mangmangkoba man'gen



inesa inbo. Salsal susrangkamaiakon ?

- Sone : Kuturi ino kuturi mangmangsan. Auchakani dongpaja. Chakkirang mangmangkon porale rona man'na gita tarina man'jaenga. A-wa noksiko sikee donana agre. Tusie chakate kimitna nangani gimin bang'an matnangtokbiasa.
- Sirang : Oh, angade nian nitokkuja. Maming ong'jaba. Banode maidakako man'asa ?
- Sone : Maikagen, namnikjaoba namnika dakpana nangpaegnok ! Namoba namjaoba kusi ong'en dongpaaibojok. Saoba saobarangde dongtonikjaen bakan katangaia.
- Sirang : (Sko nongnenge) Atcha, na'a angna maikoba aganna on'genma ?
- Sone : Maiko ? Aganboda.
- Sirang : Nang'kode maibadake nikman'amo ? Sing'ani bcwalde on'jachim, sing'badeatman'aha.
- Sone : Maidake nikasa ? Angara uan'uan ranggol mik-kangmikkang ! Bebeko aganode chinga ma'ningsa neng'e dikesa iano janggi tangenga.
- Sirang : Angaba indaken chanchiecnegachim. Indiba nang'ni Mikkang nitoa nitojani giminde anga miksongjachim.
- Sone : De na'anba kragijarangkosa sing'engajokona.

Sirang : Maiba dake chanchiode, na'simanga angko iano dongatna sikjaenga gita nika. Maini gimin indake chanchina nangaha anga ma'sijaenga, Na'simanga da'o dipet anggo tangka gri ineba uija aro anga namgijagipa mande ineba uikuja.

Sone : Maiko mangsonge ina ? Sawasa mai nangana nang'koara dosi galgnok ? Batesa na'a sontolgipa ine chingade nikenga. Jeba ong'bo nang'ni chanchiaming chingni chanchiamingde apsan ong'jawa aro ong'ja. Chingara mai cholchi ia nokko gale katangna man'gen ukosa chanchienga. Indiba iani bidingo mai manchako dakgen chanchikuja. Katnama katjanama maikon dakpilgnok.

Sirang : Indide angko re'angatengane .

Sone : Aha, da'osan agana, tik ka'kuja. Anga maiko daka unosa pangchakaigen.

Sirang : Jeba ong'bo angaba na'simangni bojade ong'pana sikja. Indiba iano salsa salgni dongna man'ode namgenchim inesa. Anga re'angna skang maikoba dakkuna nangbeenga. Haida anga ianon maiba tom'tomaniko aro kusiniko man'naba donga.

Sone : Nang'ni miksongako anga uisranga. Haida nang'ni

nangnika gita chanchitaina man'naba donga.....

Atcha, na'a baoni mancha re'bae batchi re'angenga ?

Sirang : Iano maiko dakna man'gen unosa pangchakaigen.

Sone : Na'a lano an'sengnikama ?

Sirang : An'senga an'sengade.

Sone : Im.....basakobade chibima rikamjoljorde mandean grienggenmo ?

Sirang : Oh, manderang dongjaoba do'orangde pring attam dongkamaiake. Do'jinma gekgak gekgak mlkoan sriksrik ritit ritik dakaniko komiata. Indiba attamrangode.....

Sone : Mai attamrangoa ?

Sirang : Aiao, an'sengbea ! Balwa balstisri jajong namode, ba.....a !

Sone : Angade roean nipakuja. Ia joloa chibima dal'aan dongpaja. Gisiktangosa tan'sengbeenggenchim ine chanchironga.

Sirang : Indiba balrorokariode an'cheng pakdabeasa. A'bri-jojol a'gal so'kario wenroroe roode namen an'sengskara. Pilakchin balwarara. Mikka onbajokode bibalrangan gapaia. Do'o matrangni mikoarangan, maiko agangen !

Sone : Namen an'sengbeenggenmo ? lanode badiaba barirango golap balsa balgnikosa nikaigen. Hing ! manderanga uarangkon serejing doke pagol daktokaba.

Sirang : (Ka'dingsmite) Ah !.....Indakede ong'-

srangjawakon da'nang ! A'rankariba dongaba.

Sone : A'rankari ?

Sirang : Bol bijak rurongdamani somoioara. Mitam mandarangni ka'tongba indaken ong'a Indiba mande chakchikgenode uarangko balatpil'taina man'a.

Sone : Oh !.....Iano dongdame aratpil'engiok. Basakon gipin biapona jite nipana man'gnok ! Bilsu kari-rangba tik gri bikgrisa.

(Sirang nitatana uchiko nie. Maiko ni'tata ?)

Sirang : Oh, kema. An'chingara bewalrangkon jamangbea. Na'ara maikoba gisik nangtee aganachimmo ?

Sone : Maiko agangnoksa ? Agangenoba nang'ni gisik rang'paani dongja. Angade maikoba man'na sik-jokode kingkot dakman'aia aro je cholchiba man'na nanga.

Sirang : Nang'ni .ka'changniko-ba uienga. Angara maina nang'ni nangana gisik nangpagensa ? Nang'koba champengjaenga, beng'aba beng'jaenga.

Sone : Oh, na'a champengna man'srangja. Na'aba bari-dapatskanade nangja.

Sirang : Maikosa bariatpagnok ?

Sone : Darangan uiake. Na'a argni ramao bak man'pana nangja.

Sirang : Indide anga mamungkoba agansrangjawajok.

Sone : Namaia. Aganchaoba basakobade namrongja. Nang'-ni songni obostako aganani gimin mittelbea. Kemane. Nang'ni somoikode chon'atbeengaha. (Sirang ajama). Na'ade neng'e tusinaba skenggnok. Angaba ajambeengjok.....Basakobade angaba chibi-ma rikamo an'senge roepagen !

Sirang : Atcha, nang' aiba matnangjaode anga ianon waltugen. Mamung ong'jawakonba ?

Sone : Maisa ong'gnok ? Aide angna baten nambata. Biade anggita uchi ichi re^e nikpaja. Bini chanchi-anirangde pangnan angni chanchiaoni bikpil ong'r-onga. Indiba angade skatang dakaia. Bini dakbo inako sengode a'gilsakan choli jawasa.

Sirang : Indide na'simangoni saksara tangkana mangmang chanchiaia, sakgipina uchi-ichi rojengjeng re'jeng-jenge bon'tokengamo ?

Sone : Songregipara maiko chanchiskara ? Nang'ni kattaba ong'a ong'ade.

Sirang : Minggipin angna aganna chol on'kuode iano manderangko dingtangmancha maibadake nikmanenga, uamangni dakbewal aro aganbewalrango. Atcha, ia noka mai dakgipamancha ?

Sone : Na'a an'tangan tik ong'chengjaengajokona gipin-

rangba tik ong'jawa ! De na'a dongbone. (Chakute re'anga).

Sirang : Ra. (Sirang saksan).

Sirang : Angaba tikde ong'bebejajokkon. Uko dakpana am'oba cholijajok, iko dakpana am'oba bon'angaijok, maian majan ong'pilaha; jiktangchi re'pilana agre cholan grijok. Saksaba mitchiode saksaba namnikjaode mai kantana anga iano donggnok ? Inghing maiba a'sel dongchongmota. Ong'jaode maina ma'atang aro notang mangmang angko indakesa jakkalna ga'aka ? Angan namjaha. Anga a'bachengaoni iamangko galchipjaode indakeba ong'jawachim ! Da'o re'bapile dakchakaniko on'epana inoa badiba bajaba inesa rotokaia. Angaba an'tangko parakmangmangnan gando ganjaenga..... Mai ong'tenga, maini a'sel ? Inghing, iamango maiba dal'bea parakgni gnang. Uara da'awalongenma ? Knasalosama ? Basako ?..... ..Oh, a'gilsak ! Ia sikdikdikani da'onasanma ? Ba jringjrotna ? Ia noko mai manchana dongengasai ? Inghing, inghing.....(Re'roroe) (Ganti rengtengata).

Jongran : M ..m ..m ..mainabama ?

Sirang : Nangjawa, Jamang jumangsa dangdikatmana. Re'angaibo, nangjawa (Re'pilangbo). (Saksan gantikonie). Ia gantiara gam'asa gam'aia, indiba aganja.

(A'palchiko nie) Ah, mikka jimnakenganaki
aramba a'ki a'ki dakbaenga. Bakon dakbreng,
bakon nibrengang jikna ba an'tanggan? (Ja'birang
gam'baa). Sawa?

Sone : Angasa (Jako chako ra'e).

Sirang : Ah, tusikujane?

Sone : Ia nang'na chakosa ra'baenga.

Sirang : Angara mamungkoba bi'kujake? Tunasa am'enga.

Sone : Jongransa knasretakon. Tik ong'srangjasae uara.
Ra, ia cha. Ringaibo, dam nangjuwaba.

Sirang : Mainasa habi jabi dakbeade? Mittelbeane.

Sone : Oh, nangjawa. Iade chingni bewalsa.

Sirang : Na'simangde angko jafa jiji dakatbeenga. Atcha
na'simanga maiko mancha dakna miksonga?

Sone : Malkosa dakgnok? Nokchakenggiparangjokona
sokgiparangkode sokachakpana nanggan. Atcha,
dongbone. (Ong'katanga).

Sirang : De. (Saksan) Iara branggipa depanteni alani
a'bachenganima? Skangara cha tangkana, da'oara
cha sokgipana! Iamanga mai dakgiparang? Ia me-
chik bi'sani agana mangmangnan aganchakna
kattakon man'jaha. Angara maidakn.anchagipa?

(Salgichika nigitdoe) "O, Isol, anga bilgri. Somo -
ini kri lakket kattako jakkalna angna bilko on'bo.
Nangni dakchakni gri anga iamangko gimaatnasia.
Jena miksonge anga re'baaha, chu'sokama dakchak-
bo....."(do'ga doktika). Sawa ? Napbaboda.

Jangme : Oh, nang'ko golmal ka'a gita. Sonea nang'na cha
ra'baahama ?

Sirang : Oe, iakai.

Jangme : Na'a ringmanjok ?

Sirang : Oe, mainabachimm-a ?

Jangme : Ong'ja, ia chara nang'na ong'jachim !

Sirang : Bebene ? Angaba bi'ade bi'kujachim, na'a Ra'-
baanasa ringataia.

Jangme : Oe, nanggo. Mamung ong'ja. Ring' a namaha.

Sirang : Namade ong'jajok. Jawana cha tariako ringe katen-
gajokona. Nang demechikan dondraanga, na'a.

Jangme : De, Mamung ong'ja. Gualaha, maiko dakkugen ?

Sirang : Wai, wai !

Jangme : Maia ? Maikoba nangengama ?

Sirang : Nangja. Indiba anga da'awalon meattam cha'e

re'anggnok. Anga maibadake dongtojabeenga.
Waltunan man'jawakon.

Jangme : Nang skasa. Angara badinpagen ? Dongangna
skoba, re'angna skoba.....De mainasa waltingahao
re'angna am'kuengasa ? Dongtooba dongtojaoba
walsamangmangkode waltuangpaboming.

Sirang : Indiba mingsa, nang'ko namnikjae re'angengade
ong'jane. Ma'sisretpanabe. Batesa na'songni
ka'sae dakanina mittelna ga'aka. Angkoba matnan-
gjava ine chanchia.

Jangme : Nang'koa mainasa matnangpagnok ? Na'asa dong-
tojabeengakon, da'nang.

Sirang : Re'angoba anga namesa re'angenga. Haida chol
man'ode basakoba re'bataigen. Unode da'o gita
habi jabi dakjanaba dongaha. Angan gualbeaha.
Ia noko mamungba kenani gri, batesa noktang gita
chanchiman'enga.

Jangme : Nang'ni miksongako uia. Indiba gipinrangde joljal
dakaia, na'ade ka'sinesa dakskaenga

Sirang : Ong'a ong'ade. Anga maibadake dongtojaengani
giminsa. Anga nangbea kamni gimin re'baahachim,
aro ruutbea bilsini ja'manosa anga da'alo sokbataia-
ha. Ma'siakonba ?

Jangme : Ma'sia. Nang skasa, angara badinpagen ?

Sirang : Darangba tikkode aganan man'ja.

Jangme : Jeba ong'bo nang'ko dongtoatnade jotton ka'beaha.

Sirang : Na'simang dakbebeaha. Anga matnangja. Name agansrangode na'simangan angni ianona re'bae grongchenggipa. Unasa anga ia noko donge ninaba chanchiaha. Da'oa angan namjajok. Ja'koltangkon sandina man'jaha.

Jangme : Darangni janggi tanganian basakobade indaken ong'ronga. Namgija a'bachengen da'o mai a'sel ong'angenga angade uipiljaenga. Basakobade uija dake jreng jreng dongon nambatpilasa.

Sirang : Na'simangni dongtogijaniko nike anga maibadake chanchiman'enga. Nang'ni chanchiaba nama namade. Jeko parake aganode.....

Jangme : (Sengnapgija) Mamung ong'jaba. Chingara sokgipa sakantikon dongtoatna kamko ka'ronga. Sako mikkang nibreng, sako ki'sang nibreng.

Sirang : Indakesama ? Kemane. Angan ma'sisretmanahkon. Iarangkko tarie bang'en koros ong'enggnokmo ? Ra, anga on'skagen.

Jangme : Nangja mangja. Chingade pangnan tarie dongkamaia. Unade on'na nangjawa. Nang'ni angni gimin ong'ai ong'jai chanchianasa duk ong'chaka.

Sirang : Hao.....mainasa ! An'ching ma'sigrike dakode maikai namgijako done re'anggensa ? Jeba ong'bo

je a'sel ongoba angade ia nokkode gualna man'jawa.
 Basakoba re'bataion nambate dongna man'ena ka'-
 donga. Songreen neng'pilengaha. Na'simangni
 cha-na mittela. Anga na'simangko gipin gitcha
 dake chanjawa.

Jangme : Chingni chu'sokgtjana kemane. Na'a gisik saangpa-
 nabe. Chingni chu'onggija kamrangna mittelako'
 man'a kraja. Batesa nang'ni duk chake dongpaan -
 ina mittela. :

Sirang : Angade re'bae dongpaegipasa, nama namjako
 baseani chol gri. Jeo man'a unon waltupana nanga-
 ia. Banoni dongtochekako man'gen ?

Jangme : De, na'a dongbone (Ong'katanga).

Sirang : De. (An'tangna) Sala, anga loljol agansranggnok.
 Knal pringo bura buri re'baeming ! Maini a'sel
 aro maia mancha angni gisikko champengenga anga
 uijaenga. Name parakjokode uamangko kusi ong'
 atgijani ja'pang gri. Skatang dake da'o angna
 iudakgipa obosta ong'enga. Sikmean tik ong'achim
 da'nang !..... Oh, mamungkon chel'bea gitasa
 nikatman'aia ! Hm..... (Tusianga).

(MANINGSA KUTURISAO).

Sone : Namjok !

Jangme : Namade ong'jajok ! Angade indake dakna sikja-chim. Na'a kragija dakani dakjani angasa da'ode gitchi nangkamenga. Mai dakako dakare ? Namnikja angade,

Sone : Maiko dakaha angara ? Na'a a'bachengaonin namnikjaode angna aganna nangachim. Iadide na'ara sanasa tariachim ?

Jangme : Dal'beade ong'kujaba. Indioba da'al knalni gisepo bia ba gipinba ong'ja maina nipil nisenggija dakode nama ong'ja. Angade namnikja.

Sone : Na'ara agrepile nangai nangjai bel'belbeade. Knalna donaibɔaha. Jeko dakaha dakaha. Bookatpilna neng'gnok. Jena da'awalo miksongaha, je cholchiba chu'sokatgnok ! (Sirangni coatko-ra'e tangka chana) Ba.. a !

Jangme : Niboching mairongpile tom'tome tusienga.

Sone : Maiako indinasa ? Gipinrangba indake mangmangde tusiaba. Hai re'gnok.

Jangme : Da'mo, on'tisa asongkuna. Me'asarangde tusiode inditan bilgrimo ?

Sone : Mikrakjokode nialbo. Mathuring mangsa gitasa. Indaken walode chu'gimik neng'takaniko nanga.

Jangme : Inghing, me'asarang pilakande indake ong'ja da nang. Jerangan mikgitalo tom'toma, tusioba apsanala. An'chingara an'chingni mikronmang-mangchi maidake nika, indakesan chanchiaia; indiba mai chong'mot ong'enggenchim ukode talja. Indake tom'tome tusiara an'chingkon nom'atpila. Na'ade angni miksongakode uipajawa.

Sone : Jawani chanchia miksongarangko angara maidake uipagnoksa? Hai, anchinga somotko indin re atenga.

Jangme : Maina joljolsa? On'tisa neng'takkuna. Namedake chanchie niho, an'chingni kamara kraama kraja?

Sone : Kraa krajani gimin chanchiani ja'pang gri. Dakman-giminko chanchibewale roara mai namgni? Badita chanchianga inditan gisiksa golmal ong'oroangna am'a.

Jangme : Asongbora, Sone.

Sone : Bini sambaonne?

Jangme : Oe, biara tusiahake aro tusidapangkugen. Bia-altuae mikrakjawa. A'paloniara darangba uijawa. On-

tisa neng'takkuna.

Sone : Maiko nachrakbeade ? Namjawane ?

Jangme : Sawa nachrakengasa ? Nang'ni jari dakanasa mat-
nangenga. Asongboda.....la mandekode mik-
gitalona' bate sontolbate nikamo' ? ' Da'nang, ia
walon uni tom'tomaniko bonchongdikatgnok !
Jumang gri tusipaara jumangraraskaa'gnok ! Ah.....
da'nang ? (Sko rim'e).

Sone : Beben tom'tome tusnade sontolaniko nanga.
Angaba-biko mitchiade ong'ja. Indiba an'chingara
bina mai namgijako dakengade ? Che, nija mangja
(An'pile).

Jangme : Somoi sokosa uiaignok. Tusikuchong. Biade
mamungkon uipajaha, da'nang ! Snakbebeode
siara siaigen.

Sone : Ai, re'gnok. Bini lekkarangkoba ra'babora. An'
chingni kuturio namedake nina. Lemkoba kimi-
tato namgenchim.

Jangme : Do'gacholchiko neuathoching. Darangba dong-
jama ?

Sone : Gri.

Jangme : Hai, re'gnok.
(Re'angtoka).

(KUTURISAO MA'NINGSA AGANGRIKA).

Jangme : (Tusienggipa Sirangko nie). Aiao, kam bang'an baksanaba ka'tongba rongjirmoroanga ! Da'nang, biade mamungkoba hisab-manggija tusienga ! Tom-tomanian gapenga gitasa chanchi'man'aia. Indake ong'srangjokoara mande tom'tomchong'motaniko man'a. Angaba bigita ong pasrangosaming !

Sone : Aide maiko ong'ai ong'jai saksan bel'belengade ? Ban kusi ong'a ban duk ong'a. Darangba pang-nande kusi ong'ja dukba ong'ja. Nang'ni a'selsa biara indake tusiengaba. Ja'mam ja'man gorial mikchi ong'a dakara maiko man'gensa. Matchat-pangpang hadepangpang chisamchi galatsrangoa ?

Jangme : Oe, indakeba namzen. Indiba iako dakna skang name chanchipaboda. Bia da'o tom'tome tusienga. Maibakai mikraktaioa kamtangko ka'taikuna man'gen. Indiba chichi galatode pangnaba ka'taijawaha. Inghing, na'a chanchikubo.

Sone : Bakbakbo, na'a. Chanchidame rona somoi dongja-jok. Bini ba'ra aro hosturangko ra'batokoa ?

Jangme : Biara da'al attamon re'anggan ine agunahachimbamo ? Da'ode.....

Sone : (Sengnaggija) Angara maiko uipaasa ? De na'a-

ara maina skangni aganja ?

Jangme : Da'sio mangmangsan angna aganara. Angade agan-
chakna man'jaen songgoke dongatjok.

Sone : Na'ara bimung golpo ka'kuane ?

Jangme : Bang'ede agangrikajok. Na'a angni cha tarie dona-
ko ra'baaha ine Jongranni agananasa daradari
re'bae niea. Unon beng'na inoba ja'manchakduga-
ah. Mai dakkugen. Ong'na nanga gita ong'angaha.

Sone : Indide na'ara mainasa asongdamkuenga ? Hai bak-
bakbojok.

Jangme : Jebadong ! Nang'ko dakchaken angaba sisranggen.
Angara nang'gitade an'chi ding'na ka'sina. Na'ara
pangnan uchi jip ichi jeng dakkamaenga, on'tisaba
ma'gipakode nisengjawa.

Sone : (Ka'chaa gnang) De angara maikosa jip jip jeng-
jeng dakengasa ? An'tangara biaptango songdimari
ja'mangaia.

Jangme : Anga indita bilsa dongbaaha, Sone. Janggi tangani
niksongani mai pilakkon ma'sigimin. Na'ara
dambe, an'chi ding'miting, Jeko daka bingbang
daskaikua. Angade mikkang ki'sang chanchiesa
daka.

Sone : Ai, na'a dakna on'jaode angara maiko dakpagen-
chim ? Na'asa chakoba tarie dona. Angade

gisiko sikbregijakosa on'eaia one'ade.

Jangme : Indide na'ara sana tarie d'ona-mangmangkode angosing'echengpabo. Jari dakala.

Sone : Sawa dongana sana tariachimne ?

Jangme : Da'nang, bon'angaignok !

Sone : Hai maiko ma'ring-damaikuna unara. Darangkoba matnangani a'bakku dongjaha. Ra, tarihojok.

Jangme : Angni napbamitingo bia ma'sikuengachim. Ia nokde'bini ong'ja ineba ua aganaha, Maiko mik-songe ina ma'sijaha.

Sone : De ia-noka bini nok ong'jajokona. Darangba ia noko tom'tome dongjawa. A'bachengaonin bia ma'sig-enode 'ndakeba ong'jawachim aro an'chingnaba naljokbatgenchim..... (Mangko de'tome) Hai, ai, na'a uchi. Maiko dakchakuenga ?

Jangme : (Samsachiko de'tome) Uh, dakpaaignok ! Indiba knasal nabataijawahane ! (Gisiko dukan gape).
(Sirangko de'tomanga).

DAK MESOKANI III

MESOKANI :—1

(Pring Seng'o Kuturio)

Sone : (Mikil reprepe). Ah, sal nabaahake, ai! Walba
tom'tome badeangjok !

Jangme : Oe, da'alnade. Knasalnasa mai ong'gnok darangba
agansona amja. Da'siwalde namen jrimbeaha !

Sone : Angade dingtangmancha da'al pringode namen
an'sengbee nikenga. Pangnaba da'al gita ritchenge
nikmankuja. Oh, chi rikamjoljol a'bri ja'ret gita ja
teng'ao niwate roakosa an'sengbee chanchimana-
enga. Oh.....basako !.....
(Be'enko krengate).

Jangme : Cheng'e ra'ode nama, nambea. Indiba angade da'al
pringode namen bilgribeesa nikskaenga. Da'alde
mamungkoba dakna man'jawa aro dakjawa. Knalo
alamala namkalpaarok.

Sone : Da'on namaegen, na'a. Na'ara da'siwalo tom'tome
tusina man'jaesa indake nikenga. Nangai nangjai
chanchie na'ara maina antangko bilgriatenga ? An-
gade da'alde uko dakna gitik ikoba ka'na gitik
dakkamaenga. Ama anga nang'o maikoba sing'nane ?

Jangme : Maiko indinbiade, jariba ong'ama ?

Sone : Ai, angkoara nitoe nikama ?

Jangme : Namaiaaba ; mai ong'a na'ara ?

Sone : Ha, ha; angade da'al pringode atchitaigimin gita
chanchipil'enga. Sa.....a.....la, salgrochipak kato-
de an'senggnok | Chibima rikamjoljol.....a'bri
ja'pa gita

Jangme : Maiko dipanengade ? Katdona man'a man'ade
indiba basakon angni neng'a namgnok ? Anga
tom'tome neng'takkuna. Da'siwalde maiba ong'-
chongmotaha ! (Nok itroka ku'rangko knaa).

Sone : Maisa ong'algnok ? Da'alde sal nambeaha. (Jon-
granna) Wai, wai, name itrokbone. Lekkarang
bilding bildang daktokaha. Mitamde nokkra-
onkon-

Jongran : Ra. Iarangkanonba ? (Kole ra'bara).

Sone : Nangjawa. Dandake donbonesa. Tang so'e galna...
Ma uko on'atboching. (Lekkako nie) M.....mai,
ai | lasai.....

Jangme : Maiasa ?

Sone : Re'bakubora. Bakbak. Iako poraiboching.

Jangme : Neng'enganoba. Golmal gondokolrara.

Sone : Iako nibo na'a (lekako on'a).

Jangme : (Ra'e nia) Ing ! angan basakobade maiba ong'gen
ine chanchienganoa. Da'ode ong'bebeaha ! (Sko
nongnenge) Bon'jok ! bon'jok ! Bon'srangjok !
(Jaksamgniko sko rim'e).

Sone : Ai ! (Ma'ako janggilo doktope).

Jangme : (Demechikko sikpakate) Sone, anga nengbeaha.
Angni janggi tangani salrang re'angaha. Andeko
anga ruu^{theen} nisoengachim aro mamungsaloba
indake nabagen ine chanchieojaha. Da'o detangkon
snakaha ! A'gilsako detangko so'otana bate dal'
hatgipa pap gri. Angaba un baksan re'angsrang-
gnok !

Sone : Ai, angko galangnabe. (Ma'ako rim'kingkinge).

Jangme : Beben na'a angna bagen dakchakbeaha. Da'o
nang'ko wate re'angna dukni ong'a Na'a namgipa
aro ka'sanenggipa demechnik aro indaken ma'ani
saksan indita bilsirangna brange dongengon galchip-
gija dakchakaniko on'aha aro simsakrongaha.
Indiba anga da'o neng'chongmotaha. Duka maidak-
gipachim da'osa anga chu'gimik uiaha, Detangkon
uigijagipa ma'a a'gilsako tange donga ni namgni
gri.

Sone : (Ma'ako rim'e). Ama, angkode chanchisrangja-
lama ? Angni saksan brangako na'a nina skama ?

Na'a an'tangan mamungkoba chanchina nangja ine skiaha. Da'ode... ..

Jangme : Ong'ja, Sone, A'gilsako pilakkon jegalna man'nabangnang, indiba badiakobade man'ja aro jeo ka'dong-ani grichim indakgipaosa pangchakani ong'skaa. Ma'ani depantena ka'saan chu'sokgipa pangchakani.

Sone : (Mikkango ka'onanga gita). Atcha, indide na'ara demechiknade ka'samaljama ?

Jangme : Angni nang'ko toptopa ku'dimarangko gisik ra'atna nangjawa. Indiba ia ka'saania uming apsan ong'ja. Ia ka'saania rit'chengbata, indiba depanteni ka'saani gri maidake tanggen ?

Sone : Maidakgipa ka'saa bilsil kolgrikna gualsrangaha !

Jangme : Oe, maironggipa ka'saani ! Uan bilsil kolgrikna bataha. Ia ning'tugipa ka'saanin dctangko salbaahachim, indiba ukon ra'chaksojaha ! Na'a da'o jekoba aganbo, anga ua gri tangchongmotjawa.

Sone : Ba..... a ! Indita anga nang baksa janggi tangrimbaaha aro je dakchakani aro ka'saaniko nangachim nang'na on'aha. Indiba na'ade da'o on'tisani giminan gisik bilding bildang uarangko gualsrangaha ! On'tisaba chanchipil'ani dongjahama ?

Jangme : Anga da'o ong'ai ong'jai chanchihewale rona somoi dongjaha. Ian chu'ongaha, chu'ongbeaha ! Je sastiko angna donsoaha, da'o man'aha. Anga

tangna krajaha.

Sone : Anga aganprakaniko nangja, nang'ni ka'saanikosa.
Jumangchin inama, dipanengama ?

Jangme : Anga mamungkon chanchina gisik ra*jaha. Changsa
dakgualachin pilakkon gimaataha ? Angna da'o
mamung ka'dimeani grijok. Norokosan angna
oaiha.

Sone : Na'ara pangnan indake agankamaenga. Bilsi
kolgrik nang baksa dongmitingo na'a angna raka
kattako changsaba aganjaha aro angni kosako ma-
mung saloba jak de*jaha.. Jegita namgijako dakgen-
chimoba na'a siani giminde janapjaha. Da'oa maina
tangna kranikjaha ? Nang'ni depantea nang'na
maiko ra*bajok.

Jangme : Beban anga indaken janggi tangaha. Indiba aganto-
pilgija duk ango su'pekoha anga pilakkon dingtang-
beesa nikaha. Da'oba anga darangkoba matnang-
kuja aro inkuja. Jeo pangchake rikaha uara gimaat-
gipasa ong'skaaha !

Sone : (Dabia gnang), Ama, na'ade angko chanchipil'-
chongmotjahama ? Angko maidake saksan watang-
nasia ! Angasa nang'ko aldumittangaha, bia ong'ja.
Janggi tanga gimik angasa nang'ko nirok sandiaha,
blade jrip jrip katdue dongaha. Ua kamtangni kri
da'o boksisko man'aha. Na'a angkoba nipana
ga'aka.

Jangme : Ong'a ai, ong'ade. Indiba anga detangkon cha' minokaha !

Sone : Biara nang'na mai janggi tanganio bak on'paaha ?
Ma'ana ka'saode maina indita bilsirangna katchipe
dongna nanga ? Indiba angade lanon donge soaiaha.
Je kusi ong'aniko man'pagenchim, lanon bon'atiaha.
Unomiting darangba angko ku'dimjaha, toptopjaha.
Ama, na'a da'o angna chu'gimik gro nanggipa ong'a.
Na'a an'tangni skako chu'sokatna angko galpilede
man'ja ! Ada simanaha, da'o una ma'ringe maiko
man'kugen ? Re'na nanga gita ramatangko re'ang-
aha, uko salbapilna an'chinga bil gri. Na'an angko
nosto ka'aha. Da'ode angko kusi ong'atna cholko
on'skabojok. Ia on'titikosan anga nang'o bi'a,
bang'e ong'ja. An'ching ma'ningsa dongangode
kusi ong'na man'gijani ja'pang gri.

Jangme : Na'a biko ma'sirikama ?

Sone : (Ma'ani sing'ako aganchakgija) Je ong'na nanga
gita ong'angaha. Na'an angna a'gilsako mamungba
ong'ja ine skiaha. Nang'ni sing'ani nama. Indiba
anga uigenoba maiko dakpagenchim ?

Jangme : Ong'ja. Darangande dosiari ong'ja. So'otrakgiraba
basakobade silchidarekon galaba.

Sone : Angaba basakobade sontole dongna chanchia. In-
dioba uigijagipa adatangna maiko dakgen ? Bian
gualaha.

Jangme : Na'ara sao pangchakpana ineming ina dakasa ?

Sone : Nang'oa !

Jangme : Na'a ja'manchakdugaaha, Sone. Angni jari dake
jrip dongaba namatjaha. Aganchaoba nama ong'ja.
Bate batesa gisikba jrimrorobaa. Maina grapa,
Sone ? Grapoba da'o mai nampiti ?

Sone : Ong'ja, ai.

Jangme : Uia. Skangodechim ! Da'o gisik ra'jaha. Indina-
chi anga nang'na ka'saja ine aganjaenga. Da'o
anga ma'sibeaha. Nang dada re'baan angni chakto-
pilgija ka'saaniko naataha. Ua jedake bon'angaha,
angaba apsan ramakon re'na nanggen.

Sone : (Ma'ako janggilo doktope) Indiba nang deme-
chikni dukara ?

Jangme : Neng'bejok-neng'taknaha. Himangai !..
(Ong'katanga).

Sone : A.....a.....i, A.....ma.....i.....i !
Angko gisik ra'pabo.
Angko !.....angko !.....
(Grapa).....

(Sone Kuturio saksan grapa)

Sone : (Saksan) Ban adatang, ban maming ? Nirokna sandina sikjaoa maina sriksrik re'baemung ku'ma dake donga. Bini as'sel anga noktangon alok galako man'aha. Da'ode sao ka'dongpakugen, sao pangchakpakugen ! Nokko runa, ma'tangko gimaatnasa re'baaiaha. Da'o angni je gnangkon ra'angaha Jeona soka anga br_angjojoe dongna nangaignok ! Sioba sawa angna mikchi ong'pagen; tangoba sawa angna sandikugen ? Songo nokoba angkode galchiptokaignok, studapaignok, intekaignok ! Ah, angna ! (grape). Bian angna kragijako dakaha aro unasa angaba gro chotskaaha. Bia angko bilsi kolgrikna togiaha. Bini a'selan ma'aba angko rikgalaha.....Oh papan ango gapjok ! Duk mikchina agre angna minggipin grijok.....grijok.....gri.....(Do'ga doktika, mikchi ipake).....Sawa ?

Sikme : (A'palchini) Songregipasa.

Sone : Iano darangkoba rakkijaha !

Sikme : (Napbara) Ong'ja angni segipakosa sandienga.

Sone : Segipa ?

Sikme : Bia mejalosan ianona re'baaha aro da'al pringo

angko gronggen ine aganachim, indiba da'o salchu-
beaha nabajahanasa sandibaenga. Maiba ong'ama ?

Sone : Iano darangba grike. Je donggipara jik-gri degri inesa
agana. Na'ara.....

Sikme : Ong'ja. Uo jik gnang, uan anga. Mainiba a'selsa
indake mesokna nangaha. Indiba da'al pringo
grongchong'motgen ine tik ka'aha.

Sone : Blade da'sipringon chakate re'angjokke.

Sikme : M.....mai ? Re'angjok ? Inghing maiko miksonga ?
Bina kuturi on'jane ?

Sone : (Ka'onange) Da'siwalnin re'angjoknesai !

Sikme : Ong'na man'jasrang ! Bini iano dongna am'ani
miksongako anga namedake uia. Maina donnuerga ?
Mai a'sel ong'aha ?

Sone : Nang'se dongchongmotjanesai ! Na'ade bebera'-
jake ?

Sikme : Bebera'ja nangggo. Bia angna agangija re'angchong-
motjiwa. Re angmanchaenga ine agunama, ba
re'bapilenga ?

Sone : Angade uija. Mainasa jawani serangko sing'rikkie
roaengna. Dari ong'ja noti ong'ja.

Sikme : Ka'sapae chanchie aganchakpabo. Mejal intal anga
gisiktango jaja jiji dongenga. Da'o ua batchi re'anga

aganjaskal anga ianoni illengjawa !

Sone : Nang'se bao na'asa uina nanga. Setang bao uko uigijagipako mai ingnok ? Jawani se bao donga angni mamung sandipaani gri.

Sikme : Na'a gualbea, na'aba sandipanade nangtela.

Sone : Mai nangan! gimin ?

Sikme : Kakketko agangenchimode, angse angko namnikja-engnaba donga, indiba ianona mejalo re'bagipara nang'ni adatangmanchan ! Ua ruutbea bilsirangna gipin biapo dongaha, indakesa.....

Sone : (Sengnapgija). Ango adatang gri ! Chinga ma'ningsasan iano dongenga. Adatang dongpaode nampagnok !

Sikme : Indide biara sawasa ? Mai ong'manchajok ? Mai a'sel ong'amangmangkode na'a angna aganna man'-ake. Ianonma, bano ? Ba na'simangan namnikjae rikbrangatatahama ?

Sone : Nang'ni agangipa "ada" iano dongchongmotjahanesai. Mai me'chikre na'a ! Aganbo inana aganpaoba bebede ra'ja. Katangsrangbo.

Sikme : (Wagam chikmijilo, mikchi jrang jrang dake)
Katja ! Nang ada bao ?

Sone : Sijok ! Simanjok !

Sikme : Am'aba am'alama na'a ? Badina bajana ! Gisik nunge sing'o nachrake rona nangja: Anga kal'sta-pako man'nade rebaja.

Sone - De siwasa nachrakenga nang'koa ? Bebera'jaode na'asaha.

Sikme : Na'ara chommitingoba gipinrangko jabrangtronga-namo ? An'chinga abisa gitan (Sepang jitbara).

Sone : Na ! Angko dangtapnabe ! Nang'ni aro angni gisepo mamung rengsi gri. Anga nachrakrongja aro nachrak-jaenga ! Nang'se da'siwalo sijok ! Na'a iano dongna nangja.

Sikme : (Krenge) Saa.....la ! Na'ara jarima ? Jari na'a. Na'a tol'enga. Bao mesokbo, mesok...

Sone : (Jitpaksoe) Angko dangtapnabenesai. Ua iano dongjajok ! Chinga biko snake galjok !

Sikme : (Sko rokreke) Angan jarijokkon. Maidaka knamalgi jako knaenga ! Na'simang sakobasa agan-enggen. Angseko ong'jaong'ja

Sone : Bebera'jaode na'asa. Anga badinkugen ? Kakketko aganoba nachilan songskaja.

Sikme : Indide maina indakaljok ?

Sone : Angoa maina sing'ane ?

Sikme : Maina sing'a maina sing'a ? (Jitbaroroe).

Sikme : Angara sko griming agangrikengama ?

Sone : Nampajok !

Sikme : Denggu me'chik na'a rokom rokom intekesa ropila, nang'kon watskajawa. (Wagam chikmijile Soneni gitoko rim'na daka). Jar!, skal, sala adatangkon adatang minggijagipa nang'kon sachiskagen !

Sone : (Mikron dal'e nia) Angko dangtapnabenesai ! Na'a sani noko asongennga uiakonba ? Nang ka'saa ka'sajani angna mai nangpara ?

Sikme : Knatimbo, Sone. Dontongnaha. Bia bano donga ba uko bao dona uko mangmangde aganpabo.

Sone : Anga agankujama ? Da'siwalo siahanesai ! (Wagam chikmijila).

Sikme : Na'songa indide skalrangsamo ?

Sone : Oe Dakna nanga gita dakmanaha. Nang'ni sandipaani mai ?

Sikme : Atcha, na'simangni snakna skang biara nang'ni "ada" ine uiachimma ?

Sone : Ma'sisretgrikani dongaha ine na'an nikengaba. Na'a a'gilsako ong'enga obostaranko talode chingni kamni gimin aiao injawa.

Sikme : (Grape) O Isol, anga uiachim ! Angan jari dakal-

jok ! Ia songo napchengarin anga iano maiba dal'bea a'sel ong'gen ine chanchisoengachim. Da'nang, na'an noko kusi ong'e dongpana miks-ongge re'bapaara antangkosa rusiaha ! A'bacheng-onin anga joljol parakchina aganman'ahachim; siap sokahakon, angko maniteljaha. Chanchiatangko ka'sine parakna inesa angko gipino dongate saksan re'baaha. Kamtangko matchotgijan sistrangaha ! Maironggipa ma'a, maironggipa no ! Aiao, aiao ! Na'song ma'ningsan kanarara an'chi ringna tari-gimin matburingsa ! Uan na'simangni rasongchim ! Da'nang, ang sena ! ang sena !.....

Sone : Da'o ja'manchakdugaaha. Ama, ada sakgnian katangjok. Jekoba aganbo, jekoba saibo. Bonmanaha, chon'manaha !

Sikme : Oh, angni mikchirang indin ga'akgramaiaha ! Angni chasongna katchagni angni be'en angni janggikon angoniko ra'angaha ! (Wagam chikmijile), na'a mikchi grigipa mc'chik, dariong'jaode nang'-koba so'otgnokchim !

Sone : So'otgnok ? So'otboda ! Angara tangoba uan, sioba uan. Sigenoba anga bisong gitade sijawa. Angnade ia nokni bilbangan baiaegen.

Sikme : Sibon mangbo, Nang'ni dongani dongjani angko algriataha. Ia pangchakaniko anga pangnaba man'-taijawaha !

Sone : Na'a jripboaha. Nang'naba angnaba mamung man'dapani gri. Apsan gitan gimaatanioba. Na'a nang'seko gimaataha aro angara angni ma'ako ! Name agangenchimode na'ade ang gitade ong'kuja maina ama sina skangan angkode nokonikon rik-galaha, nang'kode indake mangmangde dakkuja.

Sikme : Beben nang'ni obostaranko nigope ka'sachakna kraa. Biara da'siwalo sina skang badine maikon chanchipaenggenchim !

Sone : Nang'seko namnikja angade. Bia re'baani re'bajani indita da'la a'sel iano ong'na nangaha. Angaba bigitan dukko chakaha, Bini a'selan anga indita bilsirangna tom'tome gipinrang gita kusi ong'aniko man'pajaha. Bia noko donggenchimode, angaba gipin me'trarang gita dingtang dingtang jillarangchi re'e nikaniranko nikpana cholko man'genchim.

Sikme : Indide mainasa indita bilsirangna bina mai maja ong'enga sandie nipajaha ?

Sone : Chingko nangjaen katdue dongengoa maina sandig-nok ? Biasa chingko sandipa... nanga. Chingara bia griba janggi tangnamangmangde cholipaenga.

Sikme : Indide na'songo ong'timintiba ka'saani ka'tong dongmanchajamo ?

Sone : Ramram nikgija nigija maidake ka'sagnoksa ? Angasa jarike ?

Sikme : Nang'ko jari ine mangmangde inkujaba.

Sone : Jeba ong'bo anga jari daken indita salrangko re'ataha. Angni dosini kre anga dostangon saksan sigen,

Sikme : (Jitbae jak snilbara) Sone !.....

Sone : (Rake) Angko dangtapnabenesai ! Pil'nipil aganoba chu'ongjama ? Angni skoo an'chian gapaha.

Sikme : Jajrengnabe, anga nang'ko champengjawa. Anga mamungsaloba ka'sachakjawa. Mitchiani aro ka'sachakani angni ka'tongo grisrangaha. Dukan ango su'pekaha.

Sone : (Wagam chikmijile) Iade mamingan ong'kuja. Nang'koba watjawa ! Je dukko on'aha matchotesa on'sranggen ! (Jakko snile).

Sikme : Sone, na'a Sone ? Angko da jakdangdika ! Chu'ongaha.

Sone : Atcha anga nang'ko watanggen. Darangkoba ninan siksrangjaha. Indiba mingsako ma'siatna. skenga.

Sikme : Maiko miksonga ?

Sone : Ia obostarang maidake a'bachengaha aro ong'angaha darangba ma'sijawa.

Sikme : Angara maina sandirikkugen ? Setangko gimaatana duk man'ana bate mai dal'batgipa duk a'gilsako